

Guarda Nos Costa y Marina Real Savaneta presente Aruba ta duna asistencia na Sint Maarten

Diabierna atardi, Minister di Husticia mr. Arthur Dowers, a presenta na Aeropuerto Internacional Reina Beatrix, pa gradici un grupo di Guarda Nos Costa cu a muestra disponibilidad pa bay Sint Maarten hunto cu un grupo di Marina Real na Savaneta.

E meta di e biahe di ultimo ora aki pa Sint Maarten, ta pa yuda autoridad di nos isla ruman despues cu prisioneronan a rebeldia den Pointe Blanche Prison y pega parti

di e facilidad coreccional na candela, causando un situacion peligroso den e prison. Segun un comunicado di gobierno, minister Dowers, despues cu a ricibi e yamada for di su homologo di Corsou, a haci un yamada inmediatamente na Guarda Nos Costa pa duna sosten cu mantencion di orden den e prison. Lamentablemente, no por a tuma ningun di e prisioneronan di Sint Maarten aki na Aruba mirando e deterioro di nos propio Instituto Coreccional KIA.

David Leer, director di Guar-

da Nos Costa, a haci un apelacion na e personal pa duna un man na Sint Maarten y asina a logra haya 5 candidato bon prepara. E grupo di Guarda Nos Costa ta conta cu varios persona cu ta “gevangenisbewakers” cu amplio experiencia den situacionnan similar den prison.

Pa yuda mantene e seguridad na Sint Maarten, Defensa Hulandes a pone un avion militar disponibel pa transporta entre otro 16 marinier di Savaneta y 5 miembro di Guarda Nos Costa pa Sint



Maarten. Sergeant Koenders di Mariniers Kazerna Savaneta a ricibi e peticion for di nan coleganan na Sint Maarten pa duna asistencia mirando e situacion alarmante. Pa varios di e marinieran aki, e ta un bon oportunidad pa haya experiencia den tipo di opera-

tivo asina, mientras algun ya tin e experiencia caba.

E grupo di Marina Real lo keda 5 dia na Sint Maarten, mientras e grupo di Guarda Nos Costa lo keda pa 10 dia, y si mester, lo expande esaki cu algun dia mas.

Aruba ta pone base pa futuro mas resiliente cu e Agri-Innovation Park

Ministerio di Finanzas, Asunto Economico y Sector Primario a presenta e resultado preliminar di un estudio importante tocante cultivo comercial (“comerciele kassteelt”) cu ta pone Aruba un paso mas cerca na seguridad alimentario y sostenibilidad economico.

E estudio, realiza den colaboracion cu PRIVA, Santa Rosa

y TWO-Aruba y Hulanda, ta sirbi como fundeshi pa e creacion di e Agri-Innovation Park: un centro di conocimiento y produccion agricul-tural moderno cu lo traha pa futuro di Aruba.

Segun minister Geoffrey Wever, “e Agri-Innovation Park no ta solamente ta un proyecto a corto plaso, e ta un inversion structural den nos futuro. Nos ta traha pa

yega na mas independencia alimentario, crea mas oportunidad y cupo pa trabou y stimula un crecimiento economico sostenibel.”

E iniciativa ta parti di e transicion pa diversifica economia y pa traha un sistema di produccion mas local. E modelo nobo lo duna agricultornan infraestructura moderno y servicio logistico pa nan haci uzo di dje, sin cu nan mes

tin cu inverti sumanan cuantioso di antemano (“starting capital”). Asina lo crea mas oportunidad y entrada pa mas hende pa participa den e sector, engradeciendo esaki y conhuntamente e resiliencia propio di Aruba.

E proyecto no ta wordo desaroya pa competi cu agricultornan actual, sino pa fortifica nan y crea mas espacio pa innovacion, coopera-

cion y crecimiento. Minister Geoffrey Wever ta invita tur agricultornan y agri-entrepreneurs interesa pa sigui e proceso di cerca.

Pronto lo organisa un session informativo pa presenta e resultadonan preliminar. Pa mas informacion tocante e estudio y e trayecto di AIP, por tuma contacto cu Santa Rosa.

DNM ta enfatisa cu e ley di prohibicion pa core cabay riba beachnan di Aruba ta vigente

Departamento di Naturalesa y Medio Ambiente (DNM) ta informa publico en general y especialmente operadornan di tour y turistanan tocante e regulacionnan vigente cu ta prohibi coremento cu cabay riba nos beachnan blanco y pristino.

Esaki no mester bini como sorpresa como cu e ley aki ta data desde 1987. E interes a lanta cerca nos bishitantenan pasobra cu riba diferente rednan social e operadornan ta publica imagennan di hende riba cabay cu un paisahe di lama riba nos beachnan.

Ta importante pa tur hende ta consciente di e leyman aki, cual ta inclui e Landsbesluit openbare wateren en stranden y e Algemene Politie Verordening (APV). Den e articulo 25 di e Landsbesluit ta stipula claramente cu ta prohibi pa core cu cabay (trekdier) riba beachnan (stranden). Ademá, articulo 42 di e Algemene Politie Verordening ta specifica e sancionnan mara na incumplimento di e articulo menciona.

Den e ultimo tempo, DNM a ricibi keho indicando cu tin compania, operador y/of trahado cu no ta mantene nan mes na e leyman. Pa e motibo aki, nos ta enfatisa e importancia di respecta e regulacionnan aki pa proteha nos naturalesa y medio ambiente.

Nos beachnan no solamente ta e fundeshi di nos pilar economico di turismo, pero tambe ta hogar pa un diversidad di sortonan di e bida marino, incluyendo cangreunan y otro organismonan chikito.

Tambe riba beachnan turtuganan di lama ta subi pa pone nan webonan. E excremento (pupu) di cabay por trece un desbalansa den e ecosistema delicado aki y ademá no ta crea un ambiente agradable ni atractivo pa esnan cu ta bishita nos beachnan pa relaha y disfruta di nos lama.

DNM ta haci un yamada na tur compania cu ta ofrece ‘tours’ di cabay pa informan nan trahadonan encarga cu e tours, y tambe esnan cu ta bende e atraccion aki pa nan na e hotelnan (activities desk), pa no promove ac-

tividadnan di core cabay riba beach. Algun compania cu ta haci ‘photoshoot’ tambe a publica potretnan na unda cabay y cliente ta riba beach.

Nos ta referi tur organizacion na nos website, www.dnmaruba.org, unda por haya tur e leyman di proteccion di sortonan y e leyman medio ambiental vigente. DNM ta habri pa dialogo riba e tema aki durante orario di trabou, di dialuna pa diabierna for di 7:30 am te cu 4:30 pm. DNM ta ricibi kehonan oficial via email tambe na info@dnmaruba.org cu potret y informacion pa asina nos interveni den e asunto aki.

Ta mediante conscientisacion y colaboracion mutuo nos por logra un bon compromiso y asina preserva e beyesa natural di nos isla pa futuro generacion tambe por disfruta di dje. Di antemano, DNM ta gradici tur persona y compania pa nan cooperacion.

Reaccion
E topico aki a bin dilanti caba den pasado recién, cu un reaccion mixto den comuni-



dad. E biaha aki, e anuncio a bolbe ricibi hopi atencion riba rednan social.

Aunke algun usuario a aplaudi DNM pa conscientisa riba e ley en cuestion, mayoria di usuario tabata kier mira otro enfoque den e manejo di e directie. Mayoria a critica atrobe e daño cu ATV/UTV ta haci na naturalesa y a pidi DNM pa enfoca riba esaki, mientras otronan tabata puntra pakico ta tuma accion contra cabay y no contra cacho.

DNM di su banda a gradici

tur usuario pa hiba un dialogo constructivo, pero a enfatisa cu ley ta keda ley y mester respecta.

Di igual manera, pueblo mester compronde cu DNM no ta traha e ley, e ley ta antiguo y a ser traha años atras. Instancianan manera DNM ta simplemente aplica y conscientisa. Introduci of adapta ley ta den man di Parlamento di Aruba, pues usarionan cu no ta di acuerdo cu cierto ley mester trece nan preocupacion cerca e parlamentario cu cada persona a scoge pa representa su interesnan.